



Sabtu, 09 Juli 2022
Ogen: Esekiel 42:1-14



Ngadap Kuadep-adepen Tuhan



Bangsa Israel tuhu-tuhu mperdiateken kebersihan daging kula khususna adi atena ersembah man Tuhan subuk i rumah bagepe i rumahna jine. Ope ia ngadap man Tuhan wajib cuci tan, muat man pangan-pangan pe wajib cuci tan, reh kenca i darat rumah nari arus cuci tan. Janah si ilakoken erpalasken bekas penuruh Tuhan guna njagai kebadianna. Si enda sendalanan ras tuntuten hukum taurat eme kebadian. Tapi konsep kebadian e megati terjeng praktek perbahanen praktis nari alu la lit ije nilai-nilai spiritualna. Janah perbahanen si bage la ndatken pasu-pasu i bas Tuhan nari.

Adi kalak Jahudi si kin tuhu-tuhu megermet ia mpesikap dirina guna ngadap man Tuhan pe, mawen la ialoken persembahenna e, kita uga? I bas kita ersembah man Tuhan enggo nge si pesikap kel dirinta? I bas kita masuk ku rumah Tuhan bas wari minggu e, enggo nge pusuh, daging bagepe perukurenta cukup badia? Focus nge kita ndengkehken Kata Dibata sinituriken serayanNa? Ntah ku gereja pe ndai labo ersikap, seh gereja pe dekahen ngenen HP ras penanpilen kalak nge buen. Adi bage nggo nge kita ngadap man Dibata ndai? metunggunge nge kita ngadap man bana?

Maka bangunen rumah pertoton e ibahan erlapis-lapis, ruanggenna pe lit ka belat-belatna. Labo situhuna ngatakenca maka lit belat-belatta ras Tuhan. Saja arah bangunen rumah pertoton e erbahanca kita meteh maka biak daging ras dosa erbahan kita la metunggunge ndahi Tuhan. Tapi kalak si tangtangina biak dosa ras nggit terus ipelimbarui Dibata lit lalap dalanta jumpa ngadap kuadep-adepan Tuhanta. Iteruh kebadian Dibata kita ndatken pangan pertendin, besur kita nandanggi keleng ateNa si mpegegehi geluhta. Emaka jagailah dirinta, badialah maka atan ngadap man baNa.